

清

史

稿

清史稿

列傳一百六十二

白鎔

史致儼

那清安

昇寅

李宗昉

姚元之

何汝霖

季芝昌

白鎔字小山順天通州人嘉慶四年進士選庶吉士授編修典福建鄉試十八年大考二等擢贊善督安徽學政詔密詢地方利弊疏言安徽錢糧惟鳳陽泗州遭湖河之害積逋較巨遇豐稔之年循例帶徵舊額在小民以一年而輸數年之賦雖樂歲不免拮据而官吏懼譴規避多方積重難返與其存徵之名致小民口受追呼國計依然無補何如核徵之實使官吏從容措理舊額尚可漸清請嗣後二屬錢糧每年祇帶徵一年儻遇歉收再行遞緩民力漸紓催科者自顧考成行之必有效詔允行青陽有孝子曰徐守仁幼孤事母孝母沒廬墓三年鎔造廬贈賻題請旌表訪求明臣左光斗遺裔取列縣庠按試所至集士

人講學以正人心厚風俗爲本累遷少詹事道光元年督廣東學政歷詹事內閣學士七年擢工部侍郎調吏部九年偕尙書松筠赴直隸按外委白勳被誣寃斃獄護理總督屠之申以下降黜有差督江蘇學政尋偕侍郎寶興勘視南河埽料舉實以聞十一年擢左都御史召還京未至命查勘江南災賑時尙書穆彰阿朱士彥亦奉命勘湖河汛溢狀穆彰阿先回京銘遂偕士彥履勘沿河開墾工程與總督陶澍定議以上代賑赴安徽周歷太平甯國池州安慶廬州各郡先後疏劾飾災侵賑諸弊次年回京署翰林院掌院學士典順天鄉試十三年擢工部尙書典武會試故事武闈雙好不足額始取單好是科雙好不盡取中坐降大理寺卿十九年乞病歸卒於家年七十四銘事母孝教子弟嚴宜宗嘗嘉其家法之善以勉朝臣云孫桓字建侯同治二年進士授吏部主事累遷郎中掌選清嚴慎密吏不能欺爲時所稱光緒中擢兵部侍郎綜覈一如爲司官時十七年因病乞休尋卒

史致儼字容莊江蘇江都人家酷貧甫冠爲諸生學政謝墉器其才給膏火居

尊經閣讀書薦預召試未與選嘉慶四年成進士選庶吉士授編修督四川學政累遷右庶子二十一年督河南學政自滑縣匪平猶有伏莽密詔偵察疏陳彰衛二郡民間習邪教猶衆州縣編查保甲有名無實撰敦俗篇刊布以化導之商邱廩生陳忠錦以不濫保被毆知府經歷受賕反加斥責忿而自經疏劾譴罪有差道光元年典湖北鄉試累遷內閣學士三年擢刑部侍郎調禮部五年督福建學政奏分臺灣舉人中額增所屬四縣學額漳泉諸郡習械鬪諸生與者屏不與試悍風稍息九年偕侍郎鍾昌赴山西鞠獄平定知州故出人罪鞫實論兇犯如律褫知州恒杰職調刑部歷左都御史遷禮部尙書兩典順天鄉試調工部又調刑部勤於其職竟日坐堂上閱案牘罕析論難視司員如弟子任刑部凡四年京察以刑名詳慎被議敘十八年乞解職尋卒年七十九贈太子太保祀鄉賢及名宦祠

那清安字竹汀葉赫納喇氏滿洲正白旗人嘉慶十年進士授戶部主事遷翰林院侍講累遷內閣學士二十四年授禮部侍郎歷刑部工部道光元年命赴

直隸讞獄擢左都御史管光祿寺事兼都統尋遷兵部尙書調刑部四年出爲熱河都統偕左都御史松筠等赴土默特讞獄事竣疏言蒙古惡習常有移屍訛詐爲害滋甚蒙古律例凡軍流徒犯罪止折枷情重法輕請嗣後遇有假捏人命詐財者所擬軍流徒罪即行實發不準折枷以懲刁惡下所司議行六年召授左都御史逾年復任熱河都統召對詢知其母年老命仍還左都御史任十一年復授兵部尙書典順天鄉試及會試十四年以疾乞解職允之尋卒贈太子太保諡恭勤那清安工爲館體應制詩時皆誦習因與穆彰阿同榜成進士晚乃受宣宗知迭秉文衡既卒會兵部以慶廉送武會試有殘疾爲監試御史所劾先是那清安爲監射大臣曾以慶廉殘疾扣除上追念其持正予其子全慶加二級全慶光緒初官大學士自有傳

昇寅字寶旭馬佳氏滿洲鑲黃旗人拔貢考授禮部七品小京官舉嘉慶五年鄉試累遷員外郎改御史疏言學校爲人才根本請嚴課程務實用戒奢靡又疏陳防禁考試八旗生懷挾冒替諸弊從之改右庶子累遷副都御史二十一

年授盛京禮部侍郎署盛京將軍調刑部召爲工部侍郎又調刑部六年出爲熱河都統以蒙古各旗招內地游民開採煤礦往往生事械鬪疏請諭禁從之八年命赴甘肅偕總督鄂山按甯夏將軍慶山副都統哈普唐阿互劾事罷慶山即以昇寅代之歷成都綏遠城將軍命鞫鄂爾多斯京控獄奏言蒙古京控日繁請自後各部落封禁地樹立界牌以杜私墾蒙古阿勒巴圖禁止餽贈以息爭端扎薩克王貝勒等毋用內地書吏以免教唆各旗協理台吉會同盟長選舉以昭慎重盟長會盟需用烏拉應明定限制以免浮索庶積弊清而獄訟息十一年召授左都御史兼都統十二年署工部尙書京畿旱疏請發米設十廠煮粥以濟災民從之十三年偕侍郎鄂順安按西安將軍徐錕貪縱得實議褫職十四年命閱兵山東河南就鞫桐柏知縣甯飛濱故出人罪治如律命赴廣東湖南按事授禮部尙書未至卒於途優詔賜卹稱其老成清介贈太子太保諡勤直子寶琳直隸保定知府濬定州泮澤有治績寶珣同治中官兵部侍郎山海關副都統係紹祺咸豐六年進士由編修官至理藩院尙書紹誠光緒

中山西布政使從治鄭州河上終駐藏大臣紹英宣統初度支部侍郎內務府大臣

李宗昉字芝齡江蘇山陽人嘉慶七年一甲二名進士授編修典陝甘鄉試大考二等擢贊善督貴州學政累遷侍讀學士督浙江學政厯詹事內閣學士道光元年授禮部侍郎次年典會試又典江西鄉試留學政值大水歲饑與巡撫籌賑務多所全活調戶部侍郎初宗昉督學貴州時巡撫議丈全省田爲增賦計民情惶駭會檄學官徵集圖書得御史包承祚奏疏乾隆初學政鄒一桂請丈田而承祚奏駁之極言黔中山多平地少民每虛占不毛之地胥吏高下其手以丈高下不可準之田賦未必增民受其害部議停止宗昉持以示巡撫曰此事學臣嘗奏之被駁今必解其所駁乃可巡撫亦悟事得寢至是官戶部署巡撫麟慶因復奏上其事部援故事詳覆之乃定議不行厯工部吏部侍郎兼管國子監順天府尹事自七年至十年典順天鄉試二會試一浙江鄉試一得士稱盛擢左都御史禮部尙書二十四年以疾乞休二十六年卒依例賜卹

姚元之字伯昂安徽桐城人嘉慶十年進士選庶吉士授編修典陝甘鄉試入直南書房給事中花杰劾戴衢亨英和援引詔元之文字本佳斥杰詆訐尋亦罷元之入直十七年大考一等擢侍講復以武英殿刊刻聖訓有誤仍降編修十九年督河南學政疏禁坊刻類典等書以杜勦襲又密陳河南與安徽湖北交界地多捻匪陳州汝甯鹽運迥殊土匪把持並嘉納之累遷內閣學士道光十三年授工部侍郎疏陳臺灣營務積弊窩倡聚賭械鬪殺人操演雇人替代詔下閩督嚴察整頓調戶部又調刑部迭典順天江西鄉試督浙江學政未滿十八年擢左都御史召回京尋以南昌知府張寅爲江西巡撫裕泰劾罷元之爲寅疏辯臚陳政績請查辦詔斥冒昧降二級調用二十一年海防方亟疏陳廣東形勢豫籌戰守下靖逆將軍奕山等採行授內閣學士二十三年京察以年衰休致元之學於族祖鼎文章爾雅書畫並工習於掌故館閣推爲祭酒愛士好事穆彰阿素重之後以論洋務不合乃被黜咸豐二年卒

何汝霖字雨人江蘇江甯人拔貢考授工部七品小京官中式道光五年舉人



充軍機章京累遷郎中歷內閣侍讀學士大理寺少卿偕侍郎恩桂按事浙江查勘南河料塋命在軍機大臣上行走歷宗人府承副都御史二十二年授兵部侍郎調戶部偕大學士敬徵勘東河工程二十五年擢兵部尚書值太后七旬萬壽汝霖母丁年九十五世同堂賜御書扁額尋以母憂歸江蘇大水命在籍襄治賑務先是總督陶澍於江甯立豐備倉以備荒縣令虧挪穀價大吏許以他款抵汝霖曰倉穀以備凶今荒象如此汝霖不敢欺朝廷當各爲奏上乃以給賑用服闋命以一品頂戴署禮部侍郎尋署戶部尚書仍直軍機處授禮部尚書汝霖久襄樞務資勞已深尚書陳孚恩由章京躋大臣驟用事厭汝霖居其前汝霖年逾七十一日在直觸火爐幾仆孚恩笑曰人當避鎚鎚豈能避人汝霖知其諷已成豐二年以足疾乞罷直許之未幾卒諡恪慎祀鄉賢子兆瀛浙江鹽運使

季芝昌字仙九江蘇江陰人父麟直隸鉅鹿知縣居官慈惠嘉慶十八年捕邪教焚其籍免株連數千人坐捕匪不力戍伊犁芝昌年逾四十成道光十二年

一甲三名進士授編修散館第一未幾大考第三擢侍讀督山東學政十九年大考復第三擢少詹事晉詹事典江西鄉試督浙江學政母憂歸服闋擢內閣學士二十三年授禮部侍郎督安徽學政調吏部又調倉場二十八年命偕定郡王載銓籌辦長蘆鹽務清查天津倉庫疏陳蘆鹽積累各商憚於承運懸岸至四十餘處請將河南二十四州縣倣淮南例改票鹽先課後引直隸二十四州縣限半年招商招販無商販即責成州縣領運或由鹽政遴員官運支銷浮費及官役陋規永遠裁汰每年應完帑利攤及通綱額引與正課一律征收其協濟補欠充公等項加價名目概行革除並於各引鹽加斤免課每斤准其減價敵私詔依議行二十九年偕大學士耆英赴浙江閱兵並清查倉庫籌辦鹽務途經東河南河查詢節浮費裁冗員事宜奏減東河正款二十萬兩裁泉河通判歸河通判南河每年用款以三百萬兩爲率減省五六十萬兩併揚運通判於江防廳改爲江運同知裁丹陽縣丞靈璧主簿呂梁洪巡檢從之耆英病留清江浦芝昌獨赴浙江疏陳變通鹽務章程七事杭嘉紹三所引鹽分別加

斤止令完交正課松所引鹽酌裁科則虛懸口岸選商接辦並籌款收鹽緝私責成官商由運司審覈緝獲私鹽分別充賞及補課作正配銷禁革引地陋規覈裁巡驗浮費尋查州縣倉庫統計實虧之數多至三百九十餘萬請將虧數最多之員革職勒追不足則由原任上司按成分賠或由本省各官分成提補其有欠在胥吏者尤嚴補追母任倖免並從之授山西巡撫未一月召署吏部侍郎命在軍機大臣上行走尋授戶部侍郎三十年擢左都御史咸豐元年出爲閩浙總督艇匪在浙洋劫掠山東兵船被勦遁閩洋遣水師截擊賊衆畏罪投誠安置二年兼署福州將軍疏請停罷捐納舉人附生之例又奏禁鹽商代銷官運以杜取巧並從之尋以疾乞休芝昌以文字受宣宗特達之知嘗曰汝爲文行所無事譽之於射五矢無一失及查辦長蘆兩浙鹽務稱旨遂驟進膺樞務甫數月宣宗崩文宗猶欲用之畀以外任未一歲謝職歸久之卒於家未予卹典光緒初署浙閩總督文煜奏陳政績追諡文敏子念詒道光三十年進士官編修係邦楨同治十二年進士官至福建布政使

論曰承平士大夫平進而致列卿或以恪謹稱或以文學顯固不能盡有所建樹或餘澤延世子孫復繼簪纓若白鎔那清安昇寅諸人是也季芝昌晚遭殊遇已值宣宗倦勤之年暫任兼圻奉身而退其見幾知止者耶

清史稿

列傳一百六十三

辛從益

張麟

顧皋

沈維鏞

朱爲弼

程恩澤

吳傑

辛從益字謙受江西萬載人乾隆五十五年進士選庶吉士授編修遷御史以母老陳請終養嘉慶十七年起復補原官會京畿多雨詔發廩平糶從益在事釐剔弊端實惠及民時稱之疏請飭督撫詳慎甄別以澄吏治略曰外省甄別與京員不同京師耳目甚密稍有徇私難逃聖明洞鑒外省督撫權勢既尊操縱甚易豈知州縣有當切責之處亦有當體恤之處偏私則是非倒置刻覈則下情不通臣以爲大吏必持廉法之大綱略趨承之末節務幹事之勤能責安民之實效揣時勢之難易量才分之優絀而又常存敬畏之心然後能愛惜人才澄清吏治遷給事中十八年滑縣匪平軍中多携養難民子女從益疏請遣

送歸家如議行並譴領兵大員又而奏正教昌明邪說自息小民不識大義故  
易爲邪教煽惑而選人得官不問風俗淳澆祇計缺分肥瘠何以教民欲厚風  
俗宜先責成牧令厯光祿寺少卿通政司參議內閣侍讀學士光祿寺卿太常  
寺卿道光初山西學政陳官俊鑄級回京仍直上書房從益疏劾曰上書房爲  
教習諭德之地視學政爲尤重宜慎選德行敦厚器識宏達之儒臣使皇子有  
所觀法薰陶養其德性陳官俊在學政任不能遠色避嫌懲忿窒欲性行之駁  
器識之偏不宜仍居授讀之任二年遷內閣學士宣宗溫諭曰爾甚樸忠無所  
希冀亦無所揣摩有所聞見直言無隱朕無忌諱也命偕尙書文孚赴陝西讞  
獄渭南富民柳全璧殺其傭朱錫林賄知縣徐潤得免死巡撫朱勳庇之獄久  
不決從益等鞫得其狀論如法覆命陳陝西馬政之害地方官春秋計里買馬  
實則民不得直而官亦不需馬第指馬索賕以爲民病請禁革三年擢禮部侍  
郎督江蘇學政於是巡撫陶澍奏禁紳衿包漕橫索漕規下學政稽查懲治從  
益上疏曰江蘇漕額本重豈堪浮收無節州縣自應調劑閭閻尤宜體恤久懸

定額尙肆苛求明語浮收必滋流弊撫臣之意謂控漕之人即包漕之人臣以爲未必盡然官之收漕必用吏役吏役貪狠必圖肥己官旣浮收吏又朘削不特小民受害即循謹生監亦被其累激而上控此中固有不得已者撫臣又稱生監需索漕規地方官費無所出乃取償於純謹小民臣伏思吏役貪得無厭縱生監悉循循守法而小民追呼徵比之煩亦斷不能爲之少減吏役倚官府爲城社倘違例浮收無人控訴將何術以治之夫劣衿律所不宥苛政亦法所必裁矯枉勢必過正創法宜防流弊管見所及不敢不以上聞從益廉靜坦白遇非理必爭不爲權要詘八年卒於學政任所著有奏疏詩文內外集公孫龍子注

張鱗字小軒浙江長興人嘉慶四年進士選庶吉士習國書授檢討仁宗臨幸翰林院鱗獻詩册被恩賞十七年大考二等遷贊善歷侍講庶子二十年選翰林官入直懋勤殿纂輯秘殿珠林石渠寶笈鱗與焉歷侍講學士國子監祭酒二十四年典江西鄉試尋以齋戒未至齋所降授太常寺少卿遷通政使司副

使太僕寺卿道光元年命偕太常寺少卿明安泰赴楊村挑驗剝船遂赴東光  
盧龍兩縣訊鞠京控獄各論如律並劾承審官濫刑巡道徇庇褫黜有差三年  
轉太常寺卿督安徽學政擢內閣學士七年以繼母憂歸服闋補原官擢兵部  
侍郎督福建學政十三年補戶部又調吏部福建縣丞秦師韓控許總督程祖  
洛侍郎趙盛奎偕麟同案鞠白其誣師韓遣戍麟清廉儉素杜絕干謁兩爲學  
政卻陋規拔寒畯閩人尤頌之衡文力矯通榜之習十五年典會試以校閱勞  
致疾出闕卒福建士民請祀名宦祠

顧皋字欽齋江蘇無錫人嘉慶六年一甲一名進士授修撰九年督貴州學政  
釐剔弊竇奏改黎平開泰學額士林頌之超擢國子監司業二十一年直懋勤  
殿編輯秘殿珠林石渠寶笈懋翰林院侍讀左右庶子侍講學士侍讀學士典  
陝甘鄉試二十四年入直上書房甚被仁宗眷注二十五年扈蹕熱河上升遐  
之日御筆擢皋詹事次日宣宗即位執皋手大慟道光元年遷內閣學士擢工  
部侍郎兼管錢法堂二年調戶部連典順天浙江鄉試管理國子監事務皋在



戶部不爲激亢之行考覈利病慎稽出納不可干以私營日學期見諸實用吾久迴翔於文學侍從及任經世理物之責未能壹志專慮以求稱職爲自愧耳八年以病乞歸十一年卒

沈維鏞字子彝浙江嘉興人嘉慶七年進士選庶吉士授編修歷司業洗馬與修全唐文西巡盛典一統志入直懋勤殿纂輯秘殿珠林石渠寶笈二十一年督湖北學政禁習邪教以端士風累遷侍讀學士道光二年典福建鄉試留學政疏陳州縣私設班館之弊請飭嚴禁並禁監生充緝捕催科諸役四年遷大理寺少卿八年督順天學政轉太僕寺卿任滿遷宗人府丞署副都御史尋實授十二年督安徽學政奏請增建壽州考棚與鳳陽分試瀕江水災偕疆吏會籌賑撫士民頌之維鏞居官廉屢視學所至弊絕風清振拔多知名士宣宗知之期滿連任擢工部侍郎十七年請回籍營葬詔予假三月毋庸開缺事竣回京十八年以耳疾許免職而病痊以聞逾年卒於家維鏞學以宋儒爲歸謂典章制度與夫聲音訓詁當宗漢人而道理則備於程朱務爲身心有用之學校

刊宋儒諸書以教士時稱其醇謹焉祀鄉賢祠

朱爲弼字右甫浙江平湖人嘉慶十年進士授兵部主事遷員外郎道光元年授御史遷給事中疏請整頓京師緝捕効倉場覆奏海運倉豆石徵變情形不實命大臣按鞫侍郎和桂張映漢並被譴又疏陳江蘇海口壅塞浙江上游均受其害請疏濬太湖下游劉河吳淞諸水爲一勞永逸之計如所議行四年擢順天府府丞遷府尹有蝗孽單騎馳視卻屬官供張曰吾爲蝗來乃以我爲蝗耶六年復降授府丞歷通政司副使太常寺卿宗人府府丞都察院左副都御史十三年擢兵部侍郎權倉場侍郎尋實授十四年出爲漕運總督時漕船水手恣橫廬州幫在東昌械鬥傷斃多命下爲弼查辦疏言漕督例隨幫尾在前者無從遙制請責成押運官并會同地方官拏辦並定頭柁十家聯保舉發徇隱賞懲之法奏陳別弊速漕章程八事下所司議行十五年以病乞免允之二十年卒爲弼精學金石之學佐阮元纂鐘鼎彝器款識所著有蕉聲館詩文集程恩澤字春海安徽歙縣人父昌期乾隆四十五年一甲三名進士累官至侍

講學士直上書房恩澤勤學嗜奇受經於江都凌廷堪廷堪勗之曰學必天人並至博而能精所成乃大嘉慶十六年成進士選庶吉士授編修道光元年入直南書房宣宗曰汝父蘭翹先生昔年在上書房朕敬其品學汝之聲名亦所深悉宜更守素行典試四川三年督貴州學政勸民育粟蠶其利大行重刊岳珂五經以訓士鄭珍有異才特優異之餉以學卒爲碩儒六年調湖南學政任滿回京游擢國子監祭酒命充春秋左傳纂修官推本賈服不守杜氏一家之言母憂歸十一年服闋仍直南書房未補官特命典試廣東知南海曾釗名冀得之釗未與試榜發大失望所得多知名士改直上書房授惠親王讀邊內閣學士十四年授工部侍郎調戶部以部務繁罷直書房十七年卒上甚惜之優詔賜卹賜其子德威舉人恩澤博聞強識於六藝九流皆深思心知其意天象地輿千遁太乙脈經莫不窮究謂近人治算由九章以通四元可謂發明絕學而儀器則罕傳欲修復古儀器而未果詩古文辭皆深雅時乾嘉宿儒多徂謝惟大學士阮元爲士林尊仰恩澤名位亞於元爲足繼之所欲著書多未成惟

國策地名考二十卷詩文集十卷傳於世

吳傑字梅梁浙江會稽人少能文爲阮元所知以拔貢生應天津召試二等充文穎館臚錄書成授昌化教諭十九年成進士選庶吉士授編修遷御史道光二年督四川學政疏請以唐陸贄從祀文廟下部議行遷給事中出爲湖南岳常澧道歷貴州按察使順天府丞十三年川南叛夷犯邊師久無功傑疏言川夷作亂提督桂涌連戰克捷生禽首逆清溪近邊遂無夷踪楊芳繼任用兵之區僅峨邊一處夷寇不過數部落當易獲勝惟夷巢跬步皆山夏令河水盛漲徒涉尤難楊芳自抵峨邊頓兵三月臣思其故必逆夷退伏老巢水潦既降不易深入楊芳不敢以軍情入告但稱督兵進剿實皆游移觀望之辭曠日持久邊事所關非細請敕總督鄂山體察確奏毋得徇隱又疏言馭夷長策當先剿後撫未勦遽撫良莠不分兵至相率歸誠兵退復出焚掠層巒疊嶂我師轉運爲艱夷族因利伺隙倏起倏伏使我猝不及防國家旣厚集兵力自當掃穴犁庭除惡務盡使諸夷望風震懾一勞永逸自古馭夷之法討伐易而安撫難善

後之舉至要者二一曰除內奸游手無業之徒潛居夷地爲之謀主教以掠人勒贖衆業焚殺及避火器敵官軍之策夷悍而愚得之乃如虎傅翼必應名捕盡法懲治良民亦驅使回籍毋任逗留異域宣諭土司不得容留漢民營伍邏詰絕其潛入之路則奸人無繇構扇矣一曰分疆界夷族愚惰不諳農事漢民租地耕作有年既漸闢饒鹵爲膏腴羣夷涎其收穫復思奪歸構衅之原不外於此今當勘丈清釐凡漢民屯種夷地強占者勒令退還佃種者悉令贖歸無主之田墾荒已久聚成村落未便遷移畫爲漢界禁其再行侵占庶爭端永息又奏越嶲廳設撫民通判止治漢民而熟夷皆受治土司通判無專責且營伍非其所轄呼應不靈每以細故釀爲大衅請改爲撫夷通判千把總以下皆受節制疏上下鄂山議行遷內閣學士十五年擢工部侍郎連典順天鄉試及會試十六年卒

論曰宣宗最重文學廉謹之臣辛從益直言獻納張麟介絕俗沈維鏞服膺理學程恩澤博物冠時皆負清望顧皋朱爲強吳傑並以雅材迴翔卿貳亦足

紀略

清史稿

列傳一百六十四

鮑桂星

顧純

吳孝銘

陳鴻

鄂本順額

徐法績

鮑桂星字雙五安徽歙縣人嘉慶四年進士選庶吉士授編修遷中允九年典試河南留學政十三年典試江西十五年督湖北學政累遷至內閣學士十八年任滿既受代聞林清之變疏陳十事急馳至京仁宗嘉之曰汝所奏已次第施行矣擢工部侍郎充武英殿總裁桂星性質直勇於任事十九年疏陳刊書及校勘事宜又劾提調劉榮黼等不職命王大臣按之榮黼面訐桂星曾言滿總裁熙昌所校不過偏旁點畫修改徒延時日且言近日有旨旗人不足恃故督撫多用漢人上聞之怒命傳詢桂星對聞白侍郎周兆基且言在部與滿員共事多有徇私背公而兆基不承又指同官熙昌及慶溥屬託部事兩人亦不承以任性妄言下部嚴議詔斥桂星指訐慶溥熙昌屬託無據其咎小妄言朝

廷輕滿洲重漢人亂政之大者革職不准回籍今在京閉門思過責五城御史嚴察如私著詩文有怨望誹謗之詞從重治罪越五年上意解復官編修宣宗即位召對諭曰汝昔所劾今已罷斥擢侍講又擢通政司副使意頗嚮用道光四年擢詹事未幾卒桂星少從同縣吳定學後師姚鼐詩古文並有法著有進奉文及詩集又嘗用司空圖說輯唐詩品

顧純字南雅江蘇吳縣人嘉慶七年進士選庶吉士授編修十七年大考一等擢侍讀督雲南學政道經河南見吏多貪墨奸民充斥密疏陳謂不早根治恐釀巨患仁宗問樞臣樞臣微其事不以爲意明年遂有滑縣之亂在雲南課士嚴而有恩以正心術端行誼爲首次治經史辨文體按試所至聞賢士必禮遇之士風丕振任滿充日講官二十五年遷侍講學士值宣宗初政疏請停捐例再疏陳崇君德正人心飭官方三事上召對嘉納其言故事大臣子弟不得充軍機章京時值考選許一體與試純謂貴介不宜與聞樞要請收回成命事尋止左都御史松筠出爲熱河都統純上疏謂松筠正人宜留置左右失上意降



編修九歲不調先是嘉慶中純在史館撰和珅傳及進御經他人竄改和珅曾數因事被高宗詰責並未載入傳仁宗怒其失實嚴詔詰問大臣以純原稿進仁宗深是之而奪竄改者官宣宗一日閱實錄至此事嘉純直筆因言前保留松筠必非阿私特擢純右中允未一歲復侍講學士原職時回疆張格爾亂甫定純疏請於喀什噶爾沿邊增重兵以控制安集延杜回人窺伺又其地密邇英吉沙爾葉爾羌和闐皆有水草可耕牧宜募民屯田爲戰守備更請慎選大臣無分滿漢務得讀書知大體有方略者任之而以廉靜明信能拊循民回者爲之佐庶可永永無事道光十一年遷通政司副使湖南北江南江西浙江大水純疏言饑民與鹽梟糾合易生事鹽梟不盡去終爲巨患緩治之則養禍深急治之則召禍速欲禁其妄行必先謀其生路見兩淮鹽場漂沒三江兩湖勢必仰給蘆粍之鹽宜聽民往販隨時納課收課後不問所之俟鹽產盛丁力紓卽令課歸丁不限疆域事下所司格未行純性嚴正尙氣節晚益負時望從游者衆類能砥礪自立演士尤歸之其秀異者至京師多就問業焉十三年卒

吳孝銘字伯新江蘇陽湖人嘉慶十四年進士選庶吉士散館授工部主事充軍機章京十八年林清之亂甫定大軍會攻滑縣孝銘從大臣行參軍事累遷郎中道光中回疆用兵首逆張格爾濟述未獲議者欲以克復四城分封回部會長孝銘密言於樞臣曰是可行於乾隆時不可行於今日行之邊患且益甚議中止張格爾旋就俘賜花翎瀕年大水江浙兩湖被災尤數承回疆兵事後度支大絀戶部擬議宗室日以蕃衍衣食悉仰之官耗財之大者請自系出世祖以上子孫皆改爲覺羅爲覺羅者以次遞革孝銘曰茲事當密陳不宜顯言法當緩更不宜驟易宗室久受恩養一旦降爵減糧令下即大困因而呼籲朝廷不得已將必復之是良法美意終於不行也部臣是其言即使草奏上之歷鴻臚寺少卿光祿寺少卿通政司參議順天府丞仍留直軍機處十四年擢太僕寺卿再遷宗人府丞孝銘前後在樞廷二十餘年練於掌故持議悉合機宜屢膺文衡有公明稱母憂以毀致疾服闋至京尋乞病歸卒於家

陳鴻字午橋浙江錢塘人嘉慶十四年進士選庶吉士授編修遷御史剛直有

聲典試山西還力陳驛站煩擾請申定例肅郵政二十五年疏陳浙江水利略曰杭城地當省會用上下兩塘之水溉仁和錢塘海寧之田數萬餘頃源出西湖近廢不治水淤葑積塘河津耗夏旱少雨上塘枯涸舊害尤劇海寧長安鎮號產米之鄉許村黃灣場爲產鹽之地杭嘉湖甯紹諸郡賴是挽運擬請仿江蘇凌吳淞例歸民間按畝出資並飭疆臣躬履屬境凡隄塘牆壩悉復舊制俾農田旱潦有備又請北省多闢水田兼收秔稻之利庶使畿輔爲沃野無凶年皆被採納道光初年疏陳浙鹺不綱請裁鹽政歸巡撫兼理令整頓緝私嚴禁掣規重斤科派供應諸弊如議行糾劾工部弊竇最多不避權貴遷給事中二年奉命稽察銀庫其妻固賢明日今而後可送妾輩歸矣驚問之曰銀庫美差也苟爲所染昵君者腐至禍且不測妾不忍見君榮市也鴻指天自誓禁絕賂遺中庭已列花盆急揮去墮地盆碎中有藏錢益發懼遂奏庫衡年久鐵陷請敕工部選精鐵易之送庫日責成管庫大臣率科道庫員較驗然後啟用禁挪壓餽銀空白出納及劈鞘諸弊庫吏百計飾之不動復請戶部逐月移送收

銀總簿別立放銀簿鈐用印信以資考覈先是御史趙佩湘駁吏嚴其死也論者疑其中毒鴻莅庫勺水不敢飲出督雲南學政奏革陋規嚴束書吏弊風頓革遷通政司參議卒於官

鄂木順額字復亭鈕祜祿氏滿洲正藍旗人父明安泰江蘇按察使鄂木順額嘉慶二十五年進士選庶吉士授編修累遷右庶子道光四年大考一等擢翰林院侍講學士遷少詹事扈從東巡命分視御道內監前驅者多率意馳踐鄂木順額執而鞭之則懇於御前召問鄂木順額對曰關外地與關內異先驅踐踐則路壞慮驚乘輿且御道非大駕不得行臣不敢不執法上韙之命爲湖南學政以在母憂引禮力辭服闋督安徽學政遷光祿寺卿十一年大雨江溢學政駐當塗鄂木順額捐廉以賑督守令勸捐士民踊躍知縣趙汝和盡心民事而慈直忤大吏調爲鄉試同考官鄂木順額堅留治賑事得辦後上聞宣宗以爲賢期滿留任遷大理寺卿十二年鄉試往江甯考錄遺才卒於試院鄂木順額以氣節自勵在滿洲京僚中稱最大學士松筠尤重之曰君光明挺直行且

大用願自愛爲英和門下士在翰林非有故不通謁及英和謫戍獨送至數十里外英和太息曰吾愧不知人平日何曾好待君耶嘗謁掌院學士玉麟閣人弗爲通怒叱曰英相國獲罪卽若曹爲之奈何猶不知倣翼曰玉麟自往謝徐法績字熙庵陝西涇陽人嘉慶二十二年進士選庶吉士授編修以親老歸養家居十年道光九年遷御史謂諫臣當識大體不宜毛舉細故瀆上聽致久浸生厭疏陳求人才捐文法重守令緬貪墨四事會直隸河南地震成災劾罷監司不職者二人遷給事中稽察銀庫無所染十二年分校會試同官與吏乘隙爲姦匿雲南餉銀法績出關亟按之謀始沮典試湖南其副病歿獨專校閱徧搜遺卷拔取多知名士而得於遺卷者六人大學士左宗棠其首也以薦赴東河學習河工周歷兩岸詳詢利弊著錄爲東河要略一篇十四年遷太常寺少卿尋以病乞歸踰二年卒

論曰鮑桂星願純以鯁直獲譴卒見諒於明主純之建白尤卓卓矣吳孝銘通達政體鄂本順額樸誠持正陳鴻徐法績清操相繼冀挽頽風而庫藏大獄卒

發於十數年之間甚矣實心除弊之罕觀其人也

清史稿

列傳一百六十五

黃爵滋

金應麟

陳慶鏞

蘇廷魁

朱琦

黃爵滋字樹齋江西宜黃人道光三年進士選庶吉士授編修遷御史給事中  
以直諫負時望遇事鋒發無所回避言屢被採納十五年特擢鴻臚寺卿詔以  
爵滋及科道中馮贊勳金應麟曾望顏諸人均敢言故特加擢任風勵言官開  
忠諫之路勉其勿因驟得升階卽圖保位並以詰誠臣工焉尋疏陳察天道廣  
言路儲將才制匪民整飭京城營衛申嚴外夷防禁六事又陳漕河積弊均下  
行時英吉利船艦屢至閩浙江南山東洋面游奕測繪山川地圖爵滋疏言外  
國不可盡以恩撫而沿海無備可危十八年上禁烟議疏曰竊見近年銀價遞  
增每銀一兩易制錢一千六百有零非耗銀於內地實漏銀於外洋也蓋自鴉  
片流入中國道光三年以前每歲漏銀數百萬兩其初不過執袴子弟習爲浮

廢嗣後上自官府指紳下至工商優隸以及婦女僧道隨在吸食粵省奸商勾通兵弁用扒龍快蟹等船運銀出洋運烟入口故自道光三年至十一年歲漏銀一千七八百萬兩十一年至十四年歲漏銀二千餘萬兩十四年至今漸漏至三千萬之多福建浙江山東天津各海口合之亦數千萬兩以中土有用之財填海外無窮之窟易此害人之物漸成病國之憂年復一年不知伊於胡底各省州縣地丁錢糧徵錢爲多及辦奏銷以錢爲銀前此多有贏餘今則無不賠貼各省鹽商賣鹽得錢交課用銀昔之爭爲利藪者今則視爲畏途若再數年銀價愈貴奏銷如何能辦積課如何能清設有不測之用又如何能支今天下皆知漏卮在鴉片而未知所以禁也夫耗銀之多由於販烟之盛販烟之盛由於食烟之衆無吸食自無興販無興販則外洋之烟自不來矣宜先重治吸食臣請皇上準給一年期限戒烟雖至深之癮未有不能斷絕者至一年仍然服食是不奉法之亂民加之重刑不足恤舊例吸烟罪止枷杖其不指出興販者罪止杖一百徒三年俱係活罪斷癮之苦甚於枷杖與徒故不肯斷絕若罪



以死論臨刑之慘急苦於斷癮之苟延臣知其願死於家而不願死於市況我皇上雷霆之威赫然震怒雖愚頑沈溺之久自足以發聾振聵皇上之旨嚴則奉法之吏肅犯法之人畏一年之內尙未用刑十已戒其八九已食者藉國法以保餘生未食者因炯戒以全身命止辟之大權卽好生之盛德也伏請飭諭各督撫嚴行清查保甲初先曉諭定於一年後取具五家互結准令舉發給予優獎倘有容隱本犯照新例處死互結之家照例治罪通都大邑往來客商責成店鋪如有容留食烟之人照窩藏匪類治罪文武大小各官照常人加等子孫不准考試官親幕友家丁除本犯治罪外本管官嚴加議處滿漢官兵照地方官保甲辦理管轄失察之人照地方官辦理庶幾軍民一體上下肅清漏卮可塞銀價不至再昂然後講求理財之方誠天下萬世臣民之福也疏上上深韙之下疆臣各抒所見速議章程先是太常寺少卿許乃濟疏言烟禁雖嚴閉關不可徒法不行請仍用舊制納稅以貨易貨不得用銀購買吸食罪名專重官員士子兵丁時皆謂非政體爵滋劾乃濟罷其職連擢爵滋大理寺少卿通

政使禮部侍郎調刑部十九年廷臣議定販烟吸烟罪名新例略如爵滋所請  
林則徐至粵盡焚壘船存烟議外國人販烟罪英領事義律不就約束兵燹遂  
開二十年命爵滋偕左都御史祁寯藻赴福建查辦禁烟與總督鄧廷楨籌備  
海防泊英兵來犯廷楨屢挫敵於廈門上疑之爵滋與寯藻方至浙江按事復  
命赴福建察奏疏陳廷楨所奏不誣定海不可不速復水師有專門之技宜破  
格用人具言戰守方略又言浙江爲閩粵之心腹與江蘇爲唇齒請飭伊里布  
不可偏聽琦善信敵必退及回京復極言英人勞師襲遠不足慮宜竟與絕市  
募兵節餉爲持久計以海防圖進旣而琦善在粵議撫不得要領連歲命將出  
師廣東浙江皆不利二十二年英兵由海入江乃定和議於江甯烟禁自此弛  
矣尋丁父憂去官爵滋爲御史時稽察戶部銀庫嘗疏言庫丁輕收虧帑之弊  
二十三年銀庫虧空九百萬兩事發追論管庫查庫諸臣罪皆褫職責賠賠旣  
足次第予官爵滋以員外郎候補病足家居上猶時問其何在三十年至京會  
上崩遂不出逾三年卒爵滋以詩名喜交游每夜閉閣草奏日騎出徧視諸故

人名士飲酒賦詩意氣豪甚及創議禁烟始終主戰一時以爲清流眉目所著奏議詩文集行於世

金應麟字亞伯浙江錢塘人以舉人入貲爲中書道光六年成進士授刑部主事總辦秋審先後從大臣讞獄四川湖北山西累擢郎中改御史遷給事中疏請修改刑例於闕殿報盜劫囚誣告私鑄服舍違式斷罪引律奴婢毆主故禁故勘平人應捕人追捕罪人犯罪存留養親官司出入人罪徒流遷徙地方外省駐防逃人逐條論列多被採取改定又論銅鉛恣橫不法及驛站擾累諸弊並下各省督撫禁革先後封事數十上劾疆臣琦善河臣吳邦慶尤爲時稱宣宗嘉其敢言擢太常寺少卿遭憂歸服闋授鴻臚寺卿疏論水師廢弛漕政頽案十九年出爲直隸按察使鞫護理長蘆鹽運使楊成業等得贓獄論遣戍前運使陳崇禮等並呈議尋召爲大理寺少卿二十二年疏言海疆諸臣欺罔其故由於爵祿之念重而趨避之計工欲破其欺是在乾斷資格不可拘嫌疑不必避僭過不妨宥重賞不宜惜近頃長江海口鎮兵足守而敵船深入逃潰時

聞竭億萬氓庶之脂膏保一二庸臣之軀命議者諉謂無人無兵無餉無械竊以無人當求無兵當練無餉械亦當計度固有多則持重少則用謀作三軍之氣定邊疆之危在皇上假以事權與任事者運用一心而已復疏進預計度支圖火器圖籌海戰方略甚悉二十三年以親老乞歸省不復出著有薦華堂奏議及駢體文

陳慶鏞字頌南福建晉江人道光十二年進士選庶吉士散館授戶部主事遷員外郎授御史二十三年海疆愼事獲罪諸臣寢復起用慶鏞上疏論刑賞失措曰行政之要莫大於刑賞刑賞之權操之於君喻之於民所以示天下之大公也大學論平天下之道在於絜矩矩者何民之好惡是已海疆多事以來自總督將軍以至州縣丞倅禽獸獸奔皇上赫然震怒失律之罪法有莫追於是辱國之將軍奕山奕經參贊文蔚總督牛鑑提督余步雲先後就逮步雲伏法血氣之倫罔不拊手稱快謂國法前雖未伸於琦善今猶伸於余步雲乃未幾起琦善爲葉爾羌幫辦大臣邸報既傳人情震駭猶解之曰古聖王之待罪人

有投四裔以禦魑魅者皇上之於琦善殆其類是而今且以三品頂戴用爲熱河都統矣且用奕經爲葉爾羌幫辦大臣文蔚爲古城領隊大臣矣琦善於戰事方始首先示弱以惰軍心海內糜爛至於此極既罷斥終身不齒猶恐不足戢民心而作士氣奕經之罪雖較琦善稍減文蔚之罪較奕經又減然皇上命將出師若何慎重奕經頓兵半載曾未身歷行間聽其虛憍之氣自詭一鼓而復三城卒之機事不密貽笑敵人覆軍殺將一敗不支此不待別科騷擾供億招權納賄之罪而已不可勝誅臣亦知奕經爲高宗純皇帝之裔皇上親親睦族不忍遽加顯戮然即幸邀寬典亦當禁錮終身無爲天潢宗室羞豈圖收禁未及三月輒復棄瑕錄用且此數人者皇上特未知其見惡於民之深耳倘俯采輿論孰不切齒琦善爲罪魁誰不疾首於奕山奕經牛鑑文蔚而以爲投畀之不容緩此非臣一人之私言也側聞琦善意侈體汰跋扈如常葉爾羌之行本屬怏怏今果未及出關即蒙召還熱河密邇神京有識無識莫不撫膺太息以爲皇上嚮用琦善之意尙不止此萬一有事則憂惑聖聰者必仍係斯人履

霜堅冰深可憫懼頃者御試翰詹以烹阿封卽墨命題而今茲刑賞顧如此臣未知皇上所謂阿者何人卽墨者何人假如聖意高深偶或差忒而以卽墨爲阿阿爲卽墨將毋譽之毀之者有以淆亂是非耶所望皇上立奮天威收回成命體大學絜矩之旨鑒盈廷毀譽之眞國法稍伸民心可慰疏上宣宗嘉之諭曰朕無知人之明以致琦善奕經文蔚諸人喪師失律惟有返躬自責不欲諉罪臣工今該御史請收回成命朕非文過飾非之君豈肯回護復革琦善等職令閉門思過於是直聲震海內二十五年遷給事中巡視東城以事註吏議左遷光祿寺署正二十六年乞歸文宗卽位以大學士朱鳳標薦復授御史蹶而再起氣不少撓疊上疏多關大計自粵匪起福建羣盜蠢動蔓延泉漳興水諸郡咸豐三年慶鏞疏陳利害命回籍治團練惠安妖婦邱氏煽亂偵獲置諸法賜花翎俄以病請開缺七年逆匪林俊糾莆陽仙遊永春南安羣賊犯泉州慶鏞激厲士民固守賊攻圍數日而退論功以道員候選八年卒於泉州贈光祿寺卿賜祭葬廕一子知縣祀鄉賢祠慶鏞精研漢學而制行則服膺宋儒文辭

樸茂著有籍經堂文集三家詩考說文釋古籀考等書

蘇廷魁字賡堂廣東高要人道光十五年進士選庶吉士授編修二十二年遷御史海疆兵事方亟迭上疏論列請修築虎門礮臺及燕塘墟大沙河龜岡諸要隘以防敵回擾粵既而和議成二十三年春有白氣自天西南隅直掃參旗因災異上疏數千言極論時政乖迂歸罪樞臣穆彰阿等請立罷黜並下罪己詔開直諫之路語多指斥宣宗覽奏動容嘉其切直朝野傾望手采遺憂去官服闋遷給事中咸豐元年上謹始疏請求宏濟之道執勞謙之義防驕泰之萌推誠任賢慎始圖治選擇翰詹爲講官嚴取孝廉方正備採用文宗嘉納之賽尙阿出督師援引內閣侍讀穆蔭擢五品京堂在軍機大臣上學習行走廷魁疏劾其壞舊制用私親超擢太驟易啟倖進之門請俟賽尙阿還令回章京本任詔斥擅預黜陟猶以素行端方不之罪上先隱其名出疏示賽尙阿賽尙阿退飲臺垣酒問誰實彈我廷魁出席曰公負國某不敢負公再以憂歸咸豐四年廣東紅巾匪起將犯省城或獻議借外兵以鋪捐爲餉精力爭能其議八年

英法聯軍踞廣州廷魁與侍郎羅惇衍等倡設國防局嚴清野絕漢奸招募東莞及三元里佛山練勇得數萬人聲言戒期攻城敵師出擊斬百餘級敵始有戒心稍戢連艘北犯旣而天津議和廣東敵兵未退民益憤廷魁等請留練局以防土寇敵謂旣媾和何復募勇且以懸金購領事巴夏禮爲責言議和大臣桂良慮撓成議奏請撤局初艇匪擾廣甯圍四會肇慶兵疲糧罄或勸之去廷魁曰予國防大臣也誓與城爲存亡會提督崑壽克梧州以兵來援城得完疆臣屢欲上其功皆固辭同治初以中外大臣薦授河南開歸陳許道歷布政使擢東河總督七年河決榮澤未奪溜革職留任閏三月工竣復之踰年內召去官稱疾歸光緒四年卒

朱琦字伯韓廣西臨桂人父鳳森嘉慶六年進士官河南濬縣知縣有政聲滑縣教匪起率團練禦之屢破賊城守卒完遷河南府通判歿祀名宦琦舉鄉試第一道光十五年成進士選庶吉士授編修慕同里陳宏謀之爲人以氣節自勵遷御史值海疆事定禍機四伏而上下復習委靡言路多容默深以爲憂著



名實說略曰天下有鄉曲之行有大人之行鄉曲大人其名也攷之其行而察其有用與否其實也世之稱者曰謹厚曰廉靜曰退讓三者名之至美也而不知此鄉曲之行也非所謂大人者也大人之職在於經國家安社稷有剛毅之大節爲人主畏憚有深謀遠慮爲天下長計合則留不合以義去身之便安不暇計也世之指摘不敢逃也今也不然曰吾爲天下長計則天下之釁必集於我吾爲人主畏憚則不能久於其位不如謹厚廉靜退讓此三者可以安坐而無患而名又至美也夫無患而可久於其位又有天下美名士何憚而不爭趨於此故近世所稱公卿之賢者此三者爲多矣當其義冠襟裾從容正步趨於廊廟之間上之人不疑而非議不加其沈深不可測也一旦遇大利害搶攘無措鉗口撝舌而莫敢言而所謂謹厚廉靜退讓至此舉無可用於是始思向之爲人主畏憚而有深謀遠慮者不可得矣且謹厚廉靜退讓三者非果無用也古有負蓋世之功而思持其後挾震主之威而唯恐不終未嘗不斤斤於此故又以鎮薄俗保晚節後世無其才而冒其位安其樂而避其患假於名之至美

惘然自以爲足是藏身之固莫便此三者孔子之所謂鄙夫也其究鄉愿也是張禹胡廣趙戒之類也甚矣其恥也於是數上疏切論時務皆留中不報時咸推其抗直稱爲名御史琦以言旣不見用二十六年告歸越數年廣西羣賊蠭起其言皆驗家居治團練助守禦賊中梟傑張家祥者悔罪投誠當事猶疑之琦知其忠勇可用以全家保之乃受降改名國樑卒爲名將琦以守城勞議敘以道員候選咸豐六年再至京師居兩歲從欽差大臣桂良至江蘇無所遇王有齡獨重之有齡撫浙辟贊軍事咸豐十一年粵匪犯杭州總理團練局守清波門城陷死之贈太常寺卿予騎都尉世職祀昭忠祠琦學宗程朱詩古文皆有法著有怡志堂集臺垣奏議

論曰禁烟之議創自黃爵滋行之操切而邊釁遂開繼之游移而國威愈墮誠不可以此歸咎始議之人然謀國萬全決勝千里非特意氣爲也行固維艱言亦豈易哉金應麟同被拔擢亦始終主戰陳慶鏞蘇廷魁朱琦時稱三直合之應麟又稱四虎所言有用有不用凜凜然有生氣要足以砥頑振懦矣

清史稿

列傳一百六十六

趙慎畛

廬坤

陶澍

趙慎畛字笛樓湖南武陵人爲諸生時學政錢澧器之曰人英也嘉慶元年成進士選庶吉士授編修遷御史給事中條上川楚善後屯田保甲事宜巡通州漕革陋規廉得楊村通判科索剝船奏褫其職湖南學政徐松矜復失士心欲附慎畛自固常列其弟子俊等慎畛列款糾劾罷之兩廣總督蔣攸銑薦其才可大用十七年出爲廣東惠潮嘉道嚴治械鬪捕南澳澄海潮陽盜甚衆沿海民寮居爲通逃數悉編入保甲踰年擢廣西按察使天地會匪結黨構亂脅有質者入其中慎畛惟嚴罪匪首被脅者不坐廣東洋匪投誠後漸入廣西爲盜設水路巡船以護商旅督守令以捕盜多少爲殿最遠郡招解重囚煩費吏因諱盜省文法嚴舉劾緝捕始力二十年遷廣東布政使州縣多積虧展轉相承悉心鉤稽除其糾輻庫儲頓增南海高要瀕河隄防多圯民苦水患籌款生息

資歲修屯田五千餘頃賦重爲累請減糧額攤抵於沙坦輕則之地粵俗奢靡刊發陳宏謀行政訓俗遺規躬行節儉以示勸二十三年擢廣西巡撫習知粵西地勢如建瓴旬月不雨卽旱竭勸民修隄塘造龍骨車開蔭井設井筒架皆頒式俾倣行地連黔楚羣盜出沒宜山會匪廖五桂藍耀青分踞新舊兩墟糾衆分黨僞立名目勒索股戶爭利相擾親往捕誅之飭屬行保甲置望樓練民壯互相守望縣建卡房數十座府各督屬會營巡緝柳州至省千餘里設水汛四十三所終任凡獲盜千七百餘人盜多出於流匪編客民籍驅其單身游蕩者礦廠銀榨傭丁皆立册有保者留否則逐故事梧潯二關巡撫例得動用盈餘慎畛曰吾家衣食雖足身爲大臣取盈將安用之當爲國家布仁澤耳乃於桂林設預備倉增設書院柳州慶遠思恩三府皆創設之繕城濬河廣置棲流所並取給焉道光二年入覲宣宗嘉其誠實不欺溫諭褒勉擢閩浙總督嚴申軍律課諸鎮營汛勤訓練浙江提督沈添華玩縱劾罷之責水師緝海盜盜多就擒上游四府多山客民租山立廠游匪羣聚遣兵搜山捕誅其魁閩安所轄

有琅琦島居民多爲奸利擒治之移駐水師建礮臺遂爲省城門戶臺灣自來多亂動煩大兵慎眵尤以爲慮盡選賢能以治鳳山莠民楊良斌煽衆起事檄巡道孔昭雯知府孔傳穩勦治未一月而定不煩一兵渡海瑤瑯蘭初設治部議賦則較重奏減之民入山伐木歲供道廠船料匠首苛斂激變捕誅首亂更定採木章程乃相安戍兵萬四千更代時皆赴廈門由提督點驗遠者千里改由各提鎮分驗兵困以蘇臺灣產米漳泉數郡仰給商運江浙天津民無蓋藏米貴輒生亂於海口稽米船出數酌豐歉爲限制常留有餘疏請漳浦明儒黃道周從祀文廟下廷臣議行侯官謝金鑾德化鄭兼才皆以學行著素所敬禮歿而舉祀鄉賢又旌表義烈以振風俗五年調雲貴總督銅鑿鹽務積疲疏陳變通整頓之法以邊防莫便於屯田方考訪形勢利便未及議行而疾作病中拜疏劾貪黷不職者數十人未幾遂卒代者急遞追回原疏滇人惜之遺疏上優詔賜卹贈太子少保諡文恪祀名宦鄉賢祠慎眵服膺儒先凡有益身心可致用者皆身體力行好善嫉惡體恤屬僚訓戒懇切如師之於弟子所至於文

武官吏常能識別其才否人亦樂爲之用所著奏議從征錄載年錄讀書日記惜日筆記等書及詩文集凡數十卷

盧坤字厚山順天涿州人嘉慶四年進士選庶吉士散館授兵部主事洊遷郎中扈隨木蘭校射賜花翎十八年出爲湖南糧儲道丁本生父母憂服闋歷廣東惠潮嘉道山東兗沂曹濟道湖北按察使甘肅布政使道光元年護理陝西巡撫二年擢廣東巡撫未之任調陝西議者謂南山老林易較奸不宜開墾坤歷陳漢蜀唐宋史事及漢李翁郿閣頌以徵墾治之利專任嚴如煜假以便宜墾務大興勘修南山各屬城工漢江隄岸築壩濬淤審度形勢移駐文武增改官制又修復咸甯長安涇陽塾屋岐山寶雞華州榆林河渠水利籌補榆林綏德兩屬常平倉穀勸民捐建社倉疏陳察吏之要不獨親民官貪廉爲民身家所係其勤惰明昧寬嚴皆關民生休戚宣宗深韙之五年以母憂去官六年回疆用兵特起駐肅州偕總督鄂山治轉餉以托古遜爲運糧首站自烏魯木齊至阿克蘇置三十二站大兵五萬餘日需糧五百石每站備駝五百有奇由山

西陝西採購又蒙古阿拉善部進駝千鳥里雅蘇台調撥官駝四千疏請軍需從寬籌備兵丁量增口糧給皮衣皮帽以禦寒山口駝馬芻秣時給買補缺額營馬預備續調監造軍械務期堅實撥運陝省制錢平市價添設台站夫馬雇用車輛定例價招募護台民丁後路糧台亦添兵守護凡十一事並如議行回疆平加太子少保及張格爾就擒賜頭品頂戴服閤授山東巡撫調山西八年裁撤肅州軍局始抵任尋調廣東巡撫十年又調江蘇未至擢湖廣總督兩湖餉務狃於封輪之例道光初議散輪七年復因加價仍改封輪引滯商疲坤至疏請實行散輪建鹽倉於漢岸俾商船源源攬運尋量減售價以銷楚岸積鹽設塘角總卡按船編號以杜內私外私之弊復湖南永興粵鹽定額以保准綱湖北水災請免米稅借帑十萬兩購川米平糶疏調前兩淮鹽運使王鳳生綜理水利擇要疏濬河道修築隄堰皆以次舉行十二年湖南江華瑤趙金龍作亂粵瑤應之湖南提督海陵阿及副將游擊等皆戰歿坤親往督師密陳湖北提督羅思舉能辦賊時桂陽常德諸瑤繼起應賊常德水師荊州駐防兵皆不

習山戰坤至悉罷之改調鎮軍苗疆兵分屯要隘堅壁清野與賊相持俟兩湖  
兵大集貴州提督余步雲雲南副將曾勝亦率軍至乘雷雨襲擊洋泉街羅思  
舉督諸將晝夜環攻斃賊數千破其巢擒金龍子女及頭目數百人金龍承間  
逸爲亂軍所殲獲其屍及劍印木偶諸物捷聞賜雙眼花翎世襲一等輕車都  
尉尙書禧恩將軍瑚松額方奉命視師未至賊已平粵瑤趙仔青糾衆數千入  
楚界聲言爲金龍復仇連敗之於濠江銀江擒仔青磔於市廣東連山黃瓜寨  
瑤猶猖獗兩廣總督李鴻賓勦治不力以罪逮調坤代之偕禧恩等先後往督  
諸將進勦瑤疆悉平合疏陳兩省善後事宜改移文武官制駐所並允行十三  
年越南盜陳加海結邊地游民嘯聚狗頭山潛入內洋遣水師擊沈八船擒加  
海誅之尋越南內訌愼固邊防拒其請兵詔嘉得大體英吉利兵船擅入海口  
要乞推廣通商坤依故事停其貿易領事律勞卑挾二船入虎門礮擊不退且  
以礮拒進泊黃浦坤設方略扼其歸路斷其接濟集水陸師臨以兵威律勞卑  
窮蹙引罪求去澳門洋商代請命坤持之良久乃驅之出口疏聞詔嘉獎先奪



宮銜花翎並復之於是嚴海防勤訓練自南山至大虎分三段與沙角大角相  
聯絡省河中流沙地增建礮台以資保障夷情斂懾坤久任封圻所莅皆有名  
績宣宗深倚之十五年卒贈太子太師兵部尙書從優卹諡文肅子端黼襲世  
職曾勝廣西馬平人以行伍從勦湖南苗匪川楚教匪積功至都司累遷雲南  
參將以計擒梟渠徐黑二及宣威小梁山匪首爲時稱遷維西協副將將匪趙  
金龍之亂率師會勦擄湖南永州鎮總兵殲金龍及擒粵將趙仔青戰皆力尋  
赴廣東勦連山猺迭戰大橫橋分水嶺礮台山火燒坪軍獠里大厓冲上坵園  
猺平論功最加提督銜賜號瑚爾察圖巴圖魯子雲騎尉世職調南韶連鎮擢  
廣東陸路提督當英吉利兵船入內河水師提督李增塔不能阻勝獻策以巨  
船載石沈塞海口老洲岡隘道聚草船數百橫內河備火攻勝率兵臨之英領  
事律勞卑悚懼聽命事乃定十七年卒於官諡勳勇

陶澍字雲汀湖南安化人嘉慶七年進士選庶吉士授編修遷御史給事中疏  
劾吏部重籤河工冒濫及外省吏治積弊巡中城決滯獄八百有奇巡南漕革

陋規請溶京口運河二十四年出爲川東道日坐堂皇剖決獄訟如流請減鹽價私絕課增總督蔣攸銑薦其治行爲四川第一歷山西按察使安徽布政使道光三年就擢巡撫安徽庫款五次清查未得要領謝白爲藩司時鉤覈檔案分別應劾應償應豁於是三十餘年之糾葛豁然一清嚴交代禁流攤裁捐款至是奏定章程俾有司釋累得專力治民瀕江水災購米十萬石勸捐數十萬金賑務覈實災民賴之無失所治壽州城西湖鳳臺蕉岡湖鳳陽花源湖又懷遠新漲沙洲阻水並開引河導之入淮淮水所經勸民修隄束水保障農田各縣設豐備倉於鄉村令民秋收後量力分捐不經吏役不減糶不出易不假貸歲歉備賑樂歲再捐略如社倉法而去其弊創輯安徽通志旌表忠孝節烈以勸風俗五年調江蘇先是洪澤湖決漕運梗阻協辦大學士英和陳海運策而中外紛議撓之澍穀然以身任奏請蘇松常鎮太五府州漕糧百六十餘萬石歸海運親赴上海籌雇商船體恤商艱羣情踴躍六年春開兌至夏全抵天津無一漂損者驗米色率瑩潔過河運數倍商船回空載豆而南兩次得值船餘

耗米十餘萬石發部帑收買由漕項協濟天津通倉之用及調劑旗丁尙節省銀米各十餘萬事竣優詔褒美賜花翎明年遂偕總督蔣攸銑合疏陳海運章程八條冀垂令甲永紓漕累格於部議未果行又以紳衿包完漕米橫索陋規爲漕務之害奏請懲辦學政辛從益意不合爭之澍復疏言陋規日增勢必取償小民若預計有司不減浮收置陋規於不問非釜底抽薪之計仍執前議治包抗從嚴焉江蘇頻遭水患由太湖水洩不暢疏言太湖尾閘在吳淞江及劉河白茆河而以吳淞江爲最要治吳淞以通海口爲最要於是以海運節省銀二十餘萬興工擇賢任事至八年工竣又以江以南運道徒陽運河最易淤阻而練湖爲其上游孟瀆爲其旁支澍自巡漕時條奏利害至是先濬徒陽河將以次舉劉河白茆練湖孟瀆諸工後在總督任與巡撫林則徐合力悉加疏濬吳中稱爲數十年之利語詳則徐傳十年以捕獲戶部私造假照要犯加太子少保銜署兩江總督尋實授時准鹽敗壞商困課絀岌岌不可終日澍疏陳積弊請大刪浮費以爲補救議者多主改法課歸場竈命尙書王鼎侍郎寶興赴

江南查議澍謂除弊卽以興利無事輕改舊制借鼎等合疏臚陳利害條上十五事鼎等復請裁鹽政歸總督管理報可澍受事繳還鹽政養廉五千兩裁減衙門陋規十六萬兩有奇凡淮南之窩價淮北之壩積兩淮之岸費分別減除歲計數百萬兩分設內外二庫正款貯內庫雜項貯外庫杜絕挪墊革總商以除把持散輸規以免淹滯禁糧船回空帶蘆鹽及商船借官行私令行禁止弊風肅清淮北尤疲累先借款官督商運繼倣山東浙江票引兼行之法於海州所屬中正板浦臨興三場擇要隘設局給票注明斤數連地無票越境以私論仍留暢銷之岸江運八州縣湖運十一州縣歸商運十二年奏準開辦越半歲溢銷逾額復推廣於江運湖運各岸減價裁費商販爭趨而窩商蠹吏壩夫岸胥一旦盡失其中飽需索之利羣議沸騰言官摭浮言屢事彈劾賴宣宗鑒其忠誠倚畀愈專屢請復鹽政專職皆不許澍益感奮力排衆議毅然持之卒獲成效道光元年至十年淮南行六綱淮北僅行三綱澍承極弊之後自十一年至十七年淮南已完六綱有餘淮北率一歲行兩綱之鹽盡完從前帶欠且劑

淮南懸引兩淮共完正雜銀二千六百四十餘萬兩庫貯實存三百餘萬兩兩  
屆京察並被褒獎優敘晚年將推淮北之法於淮南已病風痺未竟其施然天  
下皆知票鹽減價敵私爲正本清源之計後咸豐中乃卒行之十八年卒遺疏  
上優詔軫惜稱其實心任事不避嫌怨晉贈太子太保依尙書例賜卹賜其子  
桃主事諡文毅祀名宦祠於海州建專祠謝見義勇爲胸無城府用人能盡其  
長所拔取多至方面節鉞有名在江南治河治漕治鹽並賴王鳳生俞德源姚  
瑩黃冕諸人之力左宗棠胡林翼皆識之未遇結爲婚姻後俱爲名臣所著奏  
議詩文集蜀輟日記陶桓公年譜陶淵明詩輯注並行世

論曰趙慎畛學有本源察吏治民嚴而能恕所至政無不舉盧坤治回疆軍需  
平湖南務馭廣東夷商皆有殊績陶澍治水利漕運鹽政垂百年之利爲屏爲  
翰庶無媿焉道光中年後海內多事諸臣並已徂謝遂無以紓朝廷南顧之憂  
人之云亡邦國殄瘁其信然哉

清史稿

列傳一百六十七

陳若霖

戴三錫

孫爾準

程祖洛

馬漢鼎

裕泰

賀長齡

陳若霖字宗觀福建閩縣人乾隆五十二年進士選庶吉士散館授刑部主事累遷郎中東鹿縣民王洪中爲人衆毆訟不得直自經死若霖鞠得其實被議敘秩滿當外用仍留部數從大臣赴各省獄以寬恕稱嘉慶十三年出爲四川鹽茶道擢山東按察使調廣東署布政使以佐總督百齡平海盜賜花翎調湖北復調四川就遷布政使二十年擢雲南巡撫水尾土州目黃金珠結內地奸民殺副州目李文政掠其家鞠實寘於法歷廣東河南浙江巡撫浙省南北新關科罰無度限以半正額爲止恤商而課裕修蕭山新廟隄建盤頭以禦潮次年新林塘圯親往勘疏言新林塘舊爲險工今距海日遠塘以外爲鼃地外復爲牧地中有馬塘足爲新林屏蔽宜補築以遏潮汐疏通鼃地各溝洫引入

牧地之莫家等灣以排洩之即以墾地之土培養新林隄基西築橫塘以禦江水責令墾牧各戶及蕭山山陰會稽三縣分別修築又奏修會稽上虞等縣塘隄並如議行二十四年擢湖廣總督湖南鳳凰等廳屯丁額多爲官佔失業者衆悉清查發還徵租官入苗寨多婪索或冒名詐財嚴禁之又以屯地磽瘠租額重爲奏減苗租二萬餘石免逋賦七萬餘石苗民感之道光二年調四川中江覃萬典鍵爲道士蕭來修等假神惑衆捕誅首犯不坐株連九姓長官司不諳吏治奏請考試獄訟別由瀘州及州判兼理四年召授工部尙書調刑部兼管順天府尹事文安縣地形如釜底自道光初隄防衝決積水不能耕種議請急行修築七年命勘湖北江黃家陵隄工疏言下游災民籲請修治潰隄上游居民謂口門下游乃襄河故道復請廢之河流經行二百餘年舍此不由而別尋二百年以前故道其說殊謬潛江天門漢川俱屬下游而天門漢川尤當衝要何忍委之巨浸惟有開通江流堵合口門因勢利導胡家灣沙洲當下游之衝以四十餘丈之地束全江之水下壅上潰理有必然今洲已衝潰乘勢挑

浚新灘展寬水道使江流無衝突之患然後增築京江鍾祥口門堤壩再於潰口築石壩二以護隄攻沙庶可經久報可十二年乞休歸卒於途賜卹

戴三錫順天大興人原籍江蘇丹徒乾隆五十八年進士授山西臨縣知縣連丁父母憂嘉慶六年服闋發四川補南充歷馬邊戡邊兩廳通判署資州眉州邛州並有政聲邛州民黃子賢以治病爲名倡立鴻鈞教捕治之事聞仁宗命送部引見擢茂州直隸州知州歷甯遠知府建昌道四川按察使道光二年遷江甯布政使迴避本籍仍調四川三年署總督五年實授兼署成都將軍三錫自牧令涪陟封疆二十餘年未離蜀地盡心民事興復通省書院增設義學三千餘所四川舊有義田積儲備賑穀多則變價添置良田三錫以歲久將膏腴多成官產留穀太多又虞霉變虧挪差定三千至萬石爲額溢額者出糶價存司庫以備凶歲賑卹之用又以蜀地惟成都附近俱平疇沃野餘多山谷饒瘠遇水衝寒膏腴轉爲砂石因地制宜多設渠堰以資捍衛宣洩新都奸民楊守一倡立邪教造妖書惑衆禽誅之越嵩生番劫奪商旅掠漢民婦女捕馭黠者



數十人寘之法救出被掠男婦給資安撫屢被詔褒獎九年因年老召來京署工部侍郎尋致仕未幾卒詔嘉其宣力有年官聲素好贈尚書銜依贈銜賜卹孫爾準字平叔江蘇金匱人廣西巡撫永清子嘉慶十年進士選庶吉士授編修十九年出爲福建汀州知府甯化民歛錢集會大吏將治以叛逆爾準訊無他狀論誅首要鮮所株連歷鹽法道江西按察使調福建就遷布政使道光元年調廣東布政使擢安徽巡撫河南邢名章等糾衆竄潁州檄按察使惠顯率兵馳勦格殺名章殲其餘黨爾準被災各屬災甚者賑卹之先是有言賑務積弊毋得以銀折錢爾準疏其弗便仍循舊章三年調福建巡撫延建各屬山徑叢錯多盜劫以萬金爲緝捕費連獲賊首寘之法盜風衰息巡閱臺灣疏言臺灣南北袤延千餘里初抵鹿耳門可行舟楫嗣增設鹿仔港而淺狹多沙內山溪水赴海別開港在嘉義間曰五條港頗利商船又噶瑪蘭山峻路險負戴難行其地有烏石港加禮遠港可通五六百石小舟皆宜設爲正口五年擢閩浙總督奏請噶瑪蘭收入版籍設官治理彰化匪徒械鬪焚劫旁近竄起全

臺震動檄水師提督許松年勦捕副將邵永福等趨艋舺阻其北竄總兵陳化成以兵渡鹿仔防其入海爾準親駐廈門遣副將佟樞等分往彰化淡水搜山圍捕訓知賊黨煽誘日衆移陸路提督馬濟勝守廈門自渡海駐彰化督勦賊首李通通捕得伏誅令各莊舉首事緝餘匪閩人捕閩人粵人捕粵人以免誣累臺人有與生番貿易遂娶番婦者俗名番割其魁黃斗乃等久踞三灣潛出爲盜當亂起時誘生番出山助鬪遣參將黃其漢等分路偵擊番竄後山士卒攀藤躡葛而登禽黃斗乃等二十一人斬以徇爾準疏陳匪徒起事由於造謠焚掠非叛逆當以強盜論淡水以北分黨報復當以械鬪論焚殺有據者始坐辟餘俱未滅其脅從旋解散者多所保全又奏臺灣北路至艋舺幾五百里僅有守備一員巡防難周調南路游擊一員駐竹塹並於大甲銅鑼灣斗換坪諸處添駐營汛改建淡水土城頭道溪爲生番出入總路亦建土城以屯丁駐守事平加太子少保七年入覲宣宗嘉其治臺灣匪亂悉合機宜迅速蔽功賜其子慧翼官主事木蘭陂者創自宋熙甯間溉民田四十萬畝築石隄千一百餘

丈以禦海潮歲久傾壞爾準道經莆田親勘修復工蒞以宋長樂室女錢創陂實功首建祠列入祀典爾準治閩最久諳悉其風土人情吏民皆相習政從寬大閩人安之九年坐失察家僕收賄鍰二級留任十一年以病乞休逾年卒贈太子太師賜子慧懃進士慧翼員外郎謚文靖祀福建名宦及鄉賢祠

程祖洛安徽歙縣人嘉慶四年進士授刑部主事洊遷郎中諳練刑名爲仁宗所知京察記名道府久未外簡以截取銓授甘肅平涼知府部臣請留詔斥規避邊遠撤銷記名留部永不外用久之擢內閣學士尋授江西按察使遷湖南布政使調山東道光二年擢陝西巡撫調河南教匪朱麻子由新蔡竄安徽阜陽捕獲寘之法與直隸山東安徽湖北毗連諸縣素多盜撥庫帑五萬兩生息爲緝捕經費漳水決安陽樊馬坊河流北徙命大學士戴均元往會勘祖洛周歷上下游合疏言漳水自乾隆五十九年南徙合洹以來衛水爲所遏每致潰溢今河流既分不可使復合議於樊馬坊上下距洹水最近處及南岸衝決成溝並築土壩使二河分流冀減漫溢之勢至四年春積水消涸地形顯露田市

之北漫水與溝隔斷不能引歸正河乃就其上游龍家莊窪地抽溝啟放復於內黃馬家窪開引河添築田家營大壩使溜勢南趨自是漳衛合併之患遂息虞城橫河惠民溝夏邑巴清河永城減水溝舊爲豫東宣洩潦水要區迭經黃河漫淤濱河連歲被災並疏濬之初河南安徽治捻匪從重典嗣部議有所減改祖洛疏言匪徒結捻倡劫黨衆一呼而集其豫謀早在結捻之時新例以是否豫謀分別輕重諸多窒礙請復舊例並論匪徒拒捕及捕人治罪各條又言獲盜究出舊案免究從前失察處分請遵嘉慶間諭旨俾除贖顧並從之七年丁母憂服闋署工部侍郎尋署湖南巡撫調江蘇十二年擢閩浙總督命查辦浙江鹽務嚴定裁汰浮費章程下部議行臺灣奸民張丙陳辦等倡亂命將軍瑚松額督兵進勦祖洛專治後路軍需十三年提督馬濟勝破賊張丙等就擒赴臺灣籌辦善後事宜劾戰守不力之都司周道龍等褫黜有差改營制增防守優敘賜花翎疏陳福建吏治略曰安民必先懲盜不可以迴護瞻顧而曲縱奸惡閩省吏治無子惠之政而務寬大之名始因官之庸劣釀成頑梗之風今

又因民之壽張遂有疲難之勢官曰民刁民曰吏虐互相傳播漸失其真官不執法幕不守法因而愚民犯法書役弄法棍徒玩法必先懲不執法之官然後能治犯法弄法玩法之人於是連劾官吏不職者略無假貸吏治始肅已革縣丞秦師韓京控提督馬濟勝賂奏邀功並訐祖洛徧袒欺蒙命侍郎趙盛奎偕學政張麟按鞫白其誣師韓遣戍新疆十五年疏陳閩洋形勢以漳州之南澳銅山爲藩籬泉之廈門金門爲門戶興化之海壇爲右翼閩安爲省會咽喉福甯之銅山爲後戶巡緝守禦全資築城礮臺就最要者四十四處由官民捐資修築十六年丁父憂去官服闋引疾不出二十八年卒宣宗甚惜之贈太子太保諡簡敬馬濟勝山東荷澤人以武生入伍從勦川陝教匪積功累擢江蘇撫標參將嘉慶十八年會勦山東教匪擢河北鎮總兵道光初擢浙江提督調福建陸路提督張丙等倡亂嘉義臺灣鎮總兵劉廷斌困守孤城濟勝率兵二千渡海赴援戰於嘉義城下大破賊追至笨港尾禽斬甚衆進屯鹽水港分兵搜勦張丙及其悍黨先後就禽時命將軍瑚松額督師猶未至詔褒成功迅速賜

雙眼花翎餘匪萬餘復來犯俟其怠擊之大潰禽頭目賴滿等追勦盡毀其巢賊遂平宣宗深嘉其謀勇錫封二等男爵又以馭兵安靖御書忠勇廉明四字賜之召入覲年逾七旬猶壯健溫詔褒獎晉二等子爵在御前侍衛上行走十六年卒於官贈太子太保諡昭武四子皆予官

裕泰滿洲正紅旗人由官學生考授內閣中書遷侍讀嘉慶末出爲四川成綿龍茂道歷四川湖南安徽按察使湖南陝西安徽布政使道光十一年擢盛京刑部侍郎調工部兼管奉天府尹事查勘科爾沁蒙旗荒地奏禁私墾十三年召授刑部侍郎尋出爲貴州巡撫十六年古州黎平土匪起禽其渠徐玉貴等誅之調湖南巡撫鎮守標兵滋事劾總兵向遵化辰沅道常慶不職罷之疏言苗疆屯田嘉慶中道員傅鼎所經營寓兵於農籌邊良策治安日久諸弊叢生今鎮守標兵因借餉倡亂苗人遂生觀望重以苗官苛刻屯長侵欺後患堪虞急應清釐損益安定章程俾將弁兵練咸知經費有常絕其覬覦仍責成鎮道實力整飭恩威並行尋議定苗疆兵勇不準客民充補預借銀穀限以定制拔

補備弁屯長嚴絕苞苴辰沅道缺以湖南知府題陞並如所議行十七年調江西復調湖南二十年擢湖廣總督二十一年湖北崇陽逆匪鍾人杰作亂踞縣城陷通城裕泰馳駐咸甯檄按察使郭熊飛率都司玉貴等進勦崇陽在萬山中賊盡塞孔道築砦抗拒選精銳出賊後夾攻分股犯蒲圻連爲官軍所敗踞崇陽西嶺爲負隅計提督劉允孝迭敗之石盤山黑橋進毀其巢禽人杰及其黨陳寶銘汪敦族等尋復通城盡俘其孥事平加太子太保賜雙眼花翎時英吉利兵山海入江詔募勇習水戰裕泰倣粵艇造大船六快船四箇漢陽水師每船百人按旬操練裁舊有巡船以節經費荊州駐防每出營滋事奏請飭地方官拘拿報將軍秉公嚴懲乾州苗竄擾勦撫解散二十九年李沅發倡亂新甯踞城戕官巡撫馮德馨提督英俊往勦復縣城妄傳沅發已死而賊竄山中勾結黔粵交界伏莽勢益蔓延馮德馨逮治專任裕泰往督師與黔粵諸軍合擊數捷三十年春搜勦山內禽殲多名賊竄永福草寮塘四面抄圍漸窮蹙裕泰度賊不南趨廣西全州卽入新甯搖嵩令提督向榮由武岡進屯廣西懷遠

遇賊擊破之賊退踞金峯嶺分三路進擊於深菁陡石間斬獲殆盡沉發就禽  
晉太子太傅尋調閩浙總督咸豐元年調陝甘入覲卒優詔以尙書例賜卹設  
莊毅子長善廣州將軍長敘侍郎

賀長齡字耦耕湖南善化人原籍浙江會稽高祖上振官湖南司獄卹囚有隱  
德貧未能歸遂家湖南長齡嘉慶十三年進士選庶吉士授編修遷贊善道光  
元年出爲江西南昌知府歷山東兗沂曹濟道江蘇按察使就遷布政使佐巡  
撫陶澍創行海運調山東七年署巡撫臨清州教匪馬進忠爲逆伏誅復有揭  
帖僞立名號刻期舉事臚列旁州縣民名數百長齡曰謀不軌詎以姓名月日  
告此移禍也誦知果出邀功者欲藉興大獄遂置不問調江南布政使乞歸養  
親十五年母喪服闋補福建布政使調直隸十六年擢貴州巡撫黔民苦訟累  
而多盜以聽斷緝捕課吏設旬報爲考覈十八年仁懷奸民穆繼賢糾四川茶  
江匪肆劫遣兵與川軍會剿焚其巢首從並就殲禽耶岱普安清鎮諸縣多種  
罌粟拔除申禁勸民種木棉玉屏婺川皆有成效黔省安置流犯三千餘人與



苗民錯處數隙易生疏請改發新疆又以鎮遠黎平都勻古州苗俗桀驁以盜爲生州縣差役緝捕難周疏請綠營每百名內精選數名分隸府廳州縣文員管轄勤加訓練專司捕盜並下部議行長齡治黔九載振興文教貴陽銅仁安順石阡四府普安八寨郎岱松桃四廳黃平普定天柱永從甕安清平興義普安諸州縣皆建書院義學省會書院分上內外三舍親試考覈刊刻經籍頒行州縣二十五年擢雲貴總督兼署雲南巡撫漢回連歲互鬪永昌回變敗退後復圖攻城城回謀內應迤西道羅天池悉捕誅之長齡親往督勦擊走叛回以肅清入告二十六年回衆藉口善良不別復叛自請議處撤銷獎敘赴大理永昌督勦匪尋竄散請免投誠張富罪軍犯王芝異團練出力亦請釋回詔斥其庸懦降補河南布政使二十七年乞病歸滇回復擾雲州多屬永昌遺孽且得羅天池濫殺狀追論長齡褫職逾年卒

論曰陳若霖戴三錫盡心民事而三錫久任獨疆治效較多孫爾準程祖洛先後治閩有聲寬嚴殊途其相濟之道乎裕泰兩殄楚寇助施燭然賀長齡儒而

不武不足以奠嚴疆也

清史稿

列傳一百六十八

帥承瀛

無錫人

嘉慶

左輔

姚祖同

程含章

康紹鏞

朱桂楨

陳鑾

吳其濬

張澧中

張日畧

帥承瀛字仙舟湖北黃梅人嘉慶元年一甲三名進士授編修累遷國子監祭酒先後督廣西山東學政歷太僕寺卿通政使副都御史署倉場侍郎授禮部侍郎調工部吏部丁母憂服闋補原官調刑部論劾郎中寶齡婪賄狀仁宗以承瀛到官浹月釐剔宿弊予議叙奉命按山西雁平道福海陝甘總督先福罷之又按山東徐文誥冤獄得平反劾承審官吏降黜有差十五年授浙江巡撫浙鹽疲敝議裁浙江鹽政歸巡撫兼理詔責承瀛整頓疏言浙江運庫尙無虧挪惟多移墊擬以報存餘價追補須足額後撥解至收支數目務劃清綱款即

有急務不再以內款墊支每年加價應許停輸向例灑帶鹽引豫估年額愈積愈多請並停止以紓商力又酌改章程十事定鹽務官制裁鹽政養廉革掣規供應竄課由場徵解銷引先正後餘引目通融行銷收支力杜弊混梟私商私並禁掣驗改復兩季申商酌裁節費下部議行浙鹺自此漸有起色寧波溫台諸府濱海土盜出沒令兵船巡緝以遏其外嚴調口岸以防其內洋面漸安兩江總督孫玉庭上八折收漕之議廷臣多言其不可下疆臣覆議承瀛疏言漕弊始由州縣浮收以致幫丁需索而幫丁沿途用費亦因以漸增迨幫丁用費愈大需索愈多州縣迫於幫費有難循舊例徵收之勢其究耗費歸之小民由此包戶侵漁刁衿挾制積弊至不可回八折之議原以去其太甚補救目前無如因弊立法而弊卽因法以生誠有如廷臣所議惟嚴禁官役需索沿途之規費除卽幫丁之用費省而州縣浮收勒折之弊亦力絕其萌庶愛民恤丁兩有裨益疏上前議遂寢清釐倉庫虧缺奏請先就現任各官次第彌補又以浙西頻遭水患應與江蘇合力疏濬察勘形勢偕孫玉庭等疏陳兩省水道原委實

共一流請專任大員綜攬全局詔韙之尋去官後陶澍至江蘇乃先治吳淞江  
焉承瀛治浙數年以廉勤著陸名揚者歸安鄉民以抗淨收得一鄉心久爲官  
吏所嫉請兵掩捕鄉民集衆抗拒而名揚逸巡撫陳若霖遽以入告遣兵往治  
久之名揚始就獲承瀛初至浙誅名揚後乃知由於官吏之釀變深悔之四年  
丁父艱服闋至京以目疾久不愈乃乞歸二十一年卒於家優詔軫惜依總督  
例加卹賜其孫遠燁舉人尋祀浙江名宦祠遠燁成道光二十七年進士官編  
修咸豐初上書言軍事納貲爲道員奏留江西勸辦捐輸七年總兵李定爲粵  
匪困於東鄉遠燁募勇往援戰歿予騎都尉世職建專祠諡文毅承瀛弟承瀚  
嘉慶十年進士由翰林院檢討歷官至副都御史方正負時譽名亞於承瀛歿  
祀鄉賢

左輔字仲甫江蘇陽湖人乾隆五十八年進士授安徽南陵知縣調霍邱勤政  
愛民坐催科不力免官嘉慶四年復之補合肥復以緝私役爲鹽販毆斃獄坐  
奪職尋初彭齡爲安徽巡撫薦輔人才可用仁宗亦素知輔循名能得民心送

部引見復職仍發安徽補懷寧遷泗州直隸州知州河決州境被災輔躬親賑撫民無失所總督百齡疏保潔已奉公政聲爲一時最以應升升用擢穎州知府十八年盱眙民孫國柱誣周永泰謀逆疆吏以聞詔那彥成侯滑縣匪平移師會剿檄輔先率兵往輔力言泗州屬縣無邪教單騎往按之得國柱誣告狀大獄以息尋捕誅阜陽教匪李珠王三保等予議敘擢廣東雷瓊道遷浙江按察使湖南布政使二十五年就擢巡撫苗疆稅重又苦官役苛擾侍郎張映漢陳其弊命輔偕總督程若霖察治奏減租穀二萬餘石籌款買補倉儲六萬餘石免民苗積逋租穀七萬餘石復挑補兵勇裁撤委員禁差役不得入苗寨聽苗食川鹽民苗便之長沙妙高峯有宋儒張栻城南書院舊址康熙中移建城內已圯規復重建課通省士子疏請御書扁額以示嘉惠士林詔嘉許焉輔官安徽最久時稱循吏晚被拔擢數年中至封圻年已老三年召來京原品休致十三年卒於家

姚祖同字亮甫浙江錢塘人乾隆四十九年南巡召試賜舉人授內閣中書充

軍機章京累遷兵部郎中以纂輯勦平教匪方略擢四五品京堂補鴻臚寺少卿歷通政司參議內閣侍讀學士鴻臚寺卿二十年出爲河南布政使請限制河工提款清查州縣交代庫儲頓充二十一年調山西又調直隸嚴查虧空令州縣自報虧數凡新任不得私受前任舊虧其新虧者勒停升補倉穀自經饑祲兼軍需支領蕩然無餘祖同飭各屬糴補數十萬石雄縣安州高陽諸縣水道淤阻連年漫溢並遴員治理相機疏濬二十二年畿輔旱災重者二十有九州縣先令停征截漕備賑徧歷災區勅屬吏辦振不實者發米賈囤積數十萬石責令平糶民賴以濟二十三年仁宗東巡濳河漲溢祖同督造橋工成賜花翎而諭曰是非爲橋工因汝能實心辦事耳二十四年擢安徽巡撫會河南大水灌入渦河下游諸縣被災祖同乘小舟巡視賑卹二十五年調河南時餓封大工未竣黃沁並漲漫及馬營工壩尾祖同相機堵禦疏陳政務雖多河工爲重學習河務以履勘爲先宣宗初卽位命祖同每屆旬以大工進占丈尺奏聞及冬日門漸狹而大河冰堅祖同親乘小舟督工鑿冰歲杪大工始告蒞道光

元年祖同疏陳河南情形略曰河工之敝壞顯而易見民生之凋瘵隱而難治河工加價自常賦三百六十餘萬外逾額攤徵衡工未已睢工繼之睢工未已馬工儀工又相繼接徵此外復有各處隄工隨時攤徵之款民力其何以堪請概停緩三年以紓積困從之開封護城大堤河溢時半圯請繕完以資保障二年河督嚴烜奏請馬營壩工拋護碎石已奉俞允復命祖同籌度祖同言時當大隄放淤過其奔衝既非順水之性伏秋盛漲壩西水勢加高上游隄埝愈險則河北可虞且慮攔沁轉致攔黃於實事爲未便乃下烜覆議卒如祖同言初儀工經費自祖同嚴覈弊竇省帑金甚鉅迨工員報銷截長補短漸合成例言官以浮冒入奏二年命左都御史王麟王鼎按之事得白而以八子錢五萬六千餘緡責祖同償補八子錢者工員以雜用不敷議以銀易錢銀一兩加扣八十文祖同置弗問卒以呈議降補太常寺少卿五年授陝西按察使請建流芳祠以祀關中士女之死節義者六年詔來京另候簡用七年授廣東按察使尋偕尙書陳若霖赴湖北察勘京山王家營隄工未幾召授通政司副使累遷左



副都御史十八年以年老重聽原品休致二十二年卒

程含章雲南景東人其先佐官吏捕殺土寇懼禍改姓羅乾隆五十七年舉人嘉慶初大挑知縣分廣東署封川坐迴護前令諱盜革職投効海疆屢殲獲劇盜擢知州署雷州府同知率鄉勇破海盜烏石大遷南雄直隸州又坐失察屬縣虧空革職尋復官以勘丈南雄州屬田畝總督蔣攸銑疏薦擢知府補惠州歷山東兗沂曹道按察使河南布政使道光二年疏言欲治河南必以治河爲先務正本清源之道在河員大法小廉實心修築加意隄防自能久安長治宣宗題其言命每屆汛期赴工稽查工料及工員才否擢廣東巡撫入覲面奏請復姓許之調山東又調江西修築德化諸縣被水圩隄設義倉行平糶四年召署工部侍郎治直隸水利上疏略曰雍正乾隆間四次興大工皆歷數年蒞事費帑數百萬自此畿內無水患者數十年迨嘉慶六年後河道漸淤道光二三年兩年淫雨被水者多至百餘州縣治水如治病必先明病之源流急則治標緩則治本循古人經驗之良方參今時變遷之證候然後疾可得而治也天津爲

衆水出海孔道諸減河皆所以洩水入海東淀廻環數百里大清子牙永定南運北運五大川流貫其中西淀容納順天保定河間三府二十餘河之水南北兩泊容納正定順德廣平三十餘河之水各有河道爲傳送之區今則消洩之尾閘無不阻塞停蓄之腹部無不淺溢流貫之腸無不壅滯收納之脾胃無不平淺傳送之機軸無不淤積吐納之咽喉無不填悶流通之血脈無不凝滯加以隄埝閘壩橋梁無不殘缺壅潦一至輒虞泛溢此畿輔水道受病之情形也伏思直隸河渠淀泊前代不聞大患自康熙三十九年以後乃恒苦水潦則永定子牙二濁河築堤之所致耳孫嘉淦有言永定子牙向皆無隄泥塗得流行田間而水不淤淀自永定築隄束水而勝芳三角淀皆淤自子牙築隄束水而臺頭等淀亦淤淀口既淤河身日高則田水入河之道阻於是淀病而全局皆病即永定一河亦已不勝其弊總因濁水入淀溜散泥沈以致斯疾此又畿輔水道致病之根原也永定河自築隄以來於今百有餘年河身高出平地一丈有餘既不能挑之使平又不能廢堤不用明知痼疾所在無術可治亦惟見病

治利多開閘壩以分其勢高築隄埝以禦其衝使不致潰決爲害而已至通省全局工段繁多自不能同時並舉惟有用治標之法先將各河淀挑挖寬深取出之土即以築隄使窪水悉得下注然後廓清中部俟大端就理乃用治本之策諸州縣支港溝渠逐一疏通俾民間灌溉有資旱潦有備三五年後元氣漸復此又辦理之先後次第也造端宏大倍於乾隆時與其緩辦費多不如速辦費少計非一二百萬所能成事請飭部寬籌經費庶不致有始無終又疏陳應修各工略謂治水在一導字欲治上游先治下游欲治旁流先治中流挑賈家口以洩永定子牙北連大清四河之水挑西隄頭引河以洩竭永淀之水挑邢家坨以洩七里海之水另開北岸一河以分斜口之勢修復減河以宣白榆之源挑濬三河頭水道添建草壩爲東淀之扼要挑濬馬道河趙北口水道爲西淀之扼要十二連橋橫互淀中亟應興修以利往來修復增河分白溝上游之勢修復窩河分白溝下游之勢則水得就下之性支派旁流乃可次第導引疏上並被嘉納實授工部侍郎尋調倉場侍郎五年授浙江巡撫六年以病辭職

上以含章精力未衰不許調山東七年因浙江巡撫劉彬士治鹽操切密疏劾其不職命總督孫爾準按治不實詔斥含章聽不根之言無端入告解職嚴議彬士亦劾含章提用商綱銀額外濫支漏追餘款等事含章疏辨命總督琦善學政朱士彥按之詔以提用綱銀歸還捐墊僅屬見小而先發妄奏之咎重念其居官尙好降補刑部員外郎八年授福建布政使以病乞歸十二年卒

康紹鏞字蘭皋山西興縣人江西廣信知府基淵子嘉慶四年進士授兵部主事充軍機章京累遷郎中擢鴻臚寺少卿十八年滑縣教匪起紹鏞隨扈以畿輔山東河南地形險易將帥賢否各鎮兵籍列冊進御受仁宗知曾有大名民人司敬武等十餘人傭工熱河錦州聞畿南寇起馳歸過山海關關吏執之誣其預聞逆謀命紹鏞偕內閣學士文孚往鞫白其誣釋之劾副都統以下論如律歷通政司參議大理寺少卿十九年出爲安徽布政使值大水被災者四十餘州縣倉穀缺乏庫儲不給勸紳商輸資各恤其鄉與官賑並舉災民賴之二十三年就擢巡撫宿州靈壁以睢河隄堰崩圯比年患水紹鏞親往相視奏請

修復又築無爲州黃絲灘臨江隄千二百餘丈先後捕獲鳳嶺等府土匪五十餘人寘諸法二十四年調廣東巡撫道光元年詔各省清查陋規雜稅紹鏞疏陳略曰廣東州縣所資辦公專在兵米折價因產穀少民間皆願折納相沿已久在馴謹良民向依舊規完納而刁生劣監不能無抗欠有於正數之內絲毫無餘者更有於正賦之內收不足數者州縣往往以贏補絀自行償補今若定爲折收額數則所浮之價悉爲應輸之額其挂欠代償恐較前益甚况貪官汙吏視所加者爲分內應得之數以所未加者爲設法巧取之數雍正時將地丁火耗酌給養廉議者謂正賦之外又加正賦將來恐耗羨之外又加耗羨八九十年以來錢糧火耗視昔有加不出前人所慮兵米折價與之事實相近即能明察暗訪堅持於數年之間斷難遠慮周防遙制於數十年之後至雜稅及舟車行戶鹽當規禮等款名目不一或此有而彼無或此多而彼寡愿者減其數以求悅黠者浮其數以取贏究之浮者即浮數已定而難改減者非減事甫過而仍加此時豪髮未盡之遺卽將來積重難返之漸其中更有強狡之徒向

不完納平餘致饋規禮今以案經奏定在有司視爲當然在小民視爲非舊兩相協制互爲告訐既不能指爲官吏分外婪索予以糾彈又不能因民間不繳陋規懲以官法寬嚴兩窮是雜稅諸項之難於清釐較兵米折價尤甚且各項所入既名陋規遂欸臚列上瀆聖聽於國家體制亦殊未協事有窒礙不敢不據實密陳疏入與兩江總督孫玉庭所議同其事遂寢二年召署禮部侍郎丁母憂歸服闋授廣西巡撫禁土司科派擾累懲土民刁訟者緝治逸匪邊境稍安五年調湖南編查洞庭湖漁船以軍法部伍之盜無所容澧州諸湖上承潒水下洩洞庭兩岸悉坵田地低下洩水不暢檄道府率屬履勘疏濬得可耕田萬四千餘畝奏蠲淤田賦萬一千餘畝從之九年入覲面陳苗疆設立苗弁額數過多倚勢虐使苗人易激事端請酌其可併省者缺出不補總督意不合格不行十年召授光祿寺卿尋值京察以在湖南任內廢弛降四品頂戴休致十四年卒

朱桂植字幹臣江蘇上元人嘉慶四年進士授吏部主事累擢郎中遷御史二

十一年出爲貴州鎮遠知府鎮遠民苗雜居無紡績之利募工教織於是始有苗布大旱民饑急發庫藏平糶施粥郡無殍人事畢自請擅動庫帑之罪民感其惠次年歲稔爭釀金還庫黃平州有盜或告變單騎臨之呼衆縛爲首者出不戮一人成五人而已興義苗閩大吏已勒兵桂植曰此苗忿民欺保不爲變使人開諭果服在任三年治行稱最擢陝西潼商道厯浙江按察使甘肅山東布政使道光三年擢山西巡撫丁父憂服闋署禮部侍郎授倉場侍郎嚴治花戶侵漁初行海運奏定漕糧到天津起卸撥運收貯章程清覈於到壩之先慎重於入倉之後著爲令九年遷漕運總督疏言漕政之艱困由於旗丁疲累而水手多係無業游民性成強悍無以恤其力而服其心寬猛皆無當欲其不滋事甚難惟密調於未然而重繩其既往請責成督運官弁遇有滋事者立時拿辦者免議日久無獲者重處時漕弊已深桂植力加整頓必究弊源不爲苛刻羣情翕服十一年調廣東巡撫却洋行陋規遇事執法外商獨嚴憚之每有勾捕不動聲色臨事集官弁曰往某所問里不擾秀民歛迹以儉素率屬一日微

服勘災歸至西關見千總與從甚盛叱止之千總叩頭請罪乃已惠潮兩郡多械鬪數興大獄痛繩以法稍輯創議諸郡山場荒地援雷瓊例給照聽民墾種設鄉約義塾教養兼施以弭匪僻誠僚屬慎刑獄治民以無冤濫始每屆秋讞多所平反十三年以病乞歸宣宗時時詢其病狀冀其出二十年卒詔嘉居官清正勤政愛民依總督例優卹賜其子鎮舉人諡莊恪祀鎮遠名宦祠

陳鑾字芝楣湖北江夏人嘉慶二十五年一甲三名進士授編修道光五年出爲江蘇松江知府創行海運鑾駐上海多所贊助署江甯值下河諸縣水災流民劫掠預設防禁設賑廠郊外議宜散不宜聚分各縣留養大縣二千人小縣千人賑畢資遣竟事無譁調蘇州歷蘇松太道江西糧道蘇松糧道廣東鹽運使浙江按察使署布政使水災治賑親勘災湖州諏訪土人知湖高於田溲港宣洩不暢規建隄防修築皖岸以保田疇十二年遷江西布政使調江蘇護理巡撫鑾自爲諸生時兩江總督百齡辟佐幕歷官江蘇最久周知利病會陶澍林則徐先後爲督撫百廢俱舉凡治漕治運濬吳淞江劉河白茆河修寶山華



亭海塘鑿並有事澍則徐皆倚如左右手十六年擢江西巡撫明年復調江蘇十九年陶澍以病解職代署兩江總督方嚴烟禁籌海防甚被倚畀疏言自嘉慶以來鄉曲細民多受邪教誘脅爲風俗人心之害由於正教不明請敕儒臣闡明聖諭廣訓黜異端之旨撰爲韻言布之鄉塾俾士民童年誦習以收潛移默化之效特詔允之是年冬卒於官贈太子少保依尙書例優卹賜其子慶涵舉人子慶滋光緒中官至江西按察使

吳其濬字淪齋河南固始人父烜兄其彥並由翰林官至侍郎屢司文柄其濬初以舉人納資爲內閣中書嘉慶二十二年成一甲一名進士授修撰二十四年典試廣東其彥亦督順天學政詞林稱盛事道光初直南書房督湖北學政歷洗馬鴻臚寺卿通政司副使超遷內閣學士十八年擢兵部侍郎督江西學政調戶部二十年偕侍郎麟魁赴湖北按事總督周天爵嫉惡嚴用候補知縣楚鏞充督署獄員製非刑逼供囚多死爲言官論劾大冶知縣孔廣義列狀許之訊鞫皆實復得楚鏞椎鹽稅貪酷及天府子光岳援引外委韓雲邦爲巡捕

事天爵論襁載戍伊犁革光岳舉人鏞荷校期滿發烏魯木齊充苦役巡撫伍長華以下降黜有差命其濬署湖廣總督尋授湖南巡撫二十二年崇陽逆匪鍾人杰作亂進窺巴陵其濬偕署提督台湧赴岳州防勦檄鎮軍兵分布臨湘平江諸隘其濬移駐湘陰賊襲平江擊卻之及人杰就禽餘黨竄湖南者以次捕誅被優敘部議裁冗兵其濬疏言湖南地逼苗疆人情易擾裁者無多徒生驕卒之疑而啟苗犛之伺總督裕泰尋定議苗疆近地並仍舊額二十三年調浙江未行武岡匪徒聚眾阻米出境戕知州捕治如律奏請於洪崖洞設巡卡編保甲以靖禍萌尋調雲南巡撫署雲貴總督二十五年調福建又調山西兼管鹽政奏裁公費一萬兩嚴捕烟販時稱其清勤二十六年乞病歸尋卒贈太子太保照例賜卹尋復以其濬在山西裁革鹽規潔已奉公特加恩子孫以彰清節子元禧主簿崇恩孫榮禧通判皆即選又賜其子承恩洪恩及孫樽讓舉人

張澧中字蘭沚陝西潼關人嘉慶二十二年進士授刑部主事充提牢廳累遷

郎中執法明允數從大臣獄黑龍江奉天江南山東道光十二年出爲直隸大順廣道奸民倡無生教惑衆禮中率兵役探其巢穴得圖卷及名冊悉焚之歸正者概不株連署按察使遷福建按察使署布政使授直隸布政使未之任調山西署巡撫二十年擢雲南巡撫於刑獄尤矜愼二十三年召署刑部侍郎尋實授二十七年河南海饑頒庫帑百萬命禮中偕尙書文慶治賑務至即飭查造丁口按冊抽查戶口調取藩庫數抽查賑銀令州縣按旬具報錢價以備考覈劾冒賑之考城令及造報舛錯各員尋授山東巡撫清查交代定追賠章程考察鎮道等官失察盜案多寡分別劾議嚴責捕盜先後獲匪盜七百餘名治如律疏言山東地廣民稠一遇歉歲曹州之捻匪沂州之掖匪幅匪武定臨清屬之梟匪衆衆每至百餘人隨地裹脅蔓延不已羣匪多起於曹沂而兗濟受害爲尤甚地方官輾轉稽延不能卽正典刑匪徒遂無顧忌惟官不以盜爲事民始敢與盜通聲氣殲厥渠魁脅從自散卽牧令中亦非無長於緝捕勇敢任事之員惟大法則小廉人存則政舉凶匪之橫行咎在牧令牧令之不職責

在上司詔嘉勉之尋卒依侍郎例賜卹

張日最貴州貴筑人嘉慶二十二年進士選庶吉士授編修道光九年出爲四川敘州知府調成都日最勤於吏職刻樹桑百益書以勸民蠶創勵節堂以瞻節婦貞女之無依者政暇招諸生於署講析經義語錄郡屬馬邊屏山等廳縣毗連猺夷令附近居民建修碉堡編聯保甲民賴以安擢建昌道十九年越嶲猺邊夷匪滋事借總兵包相卿督兵平之招復逃亡編集練勇修築碉堡於要隘建城以資保障遷浙江鹽運使再遷湖北按察使調四川治獄平恕不以平反矜能遇有疑竇飭另緝改辦告戒屬吏以哀矜爲重遷河南布政使河決中牟值祥符工甫竣兩次災區二十五州縣附省災尤重每馳詣賑所監視於郊外隙地捐俸構屋安戢災黎遂成村聚二十六年擢雲南巡撫未之任丁母憂服闋仍授雲南巡撫勤於察吏免銅廠民欠工本銀六千餘兩在任一年卒祀四川雲南名宦祠及鄉賢祠

論曰宣宗以恭儉爲治一時疆臣多清勤之選帥承瀛等或由卿寺受知或以

守令拔擢雖間有旋偏旋起晚置閒散者其猷爲要並可觀焉朱桂植實心實  
政治績稱最獨膺易名之典蓋非倖云